

En memoria d'Antieni Cavegn, Sedrun



A nossa davosa sentupada da classa havein nus concludiu da veginr ensemens puspei suenter tschun onns. «Tochen lu essan nus forsa buca tuts en veta pli», ha ina consolara manegiau. Deplorablamein ha ella giu raschun. Suenter strusch dus ónns havein nus stuviu accumpignar nies amitg e conscolar, Antieni Cavegn, al davos raus. Ina lavina haveva tschuncanau sia veta flurenta e plein speronza.

Remarcabel: Suenter nossa fiesta da classa el restaurant ha igl Antieni envidau nus tuts a ca-

8. 3. 1974

sia ad in stupent puschechn. El s'empitschava da ses «hosps» ed intimava en in tun cordial ed evident da sesurvir. Quella hospitalitat ed amicabladad ha impressiunau nus fetg!

Buca mo quella sera eis el semussaus beinvulents, quella qualitat era caracteristica per el. Perquei era el stimaus e carezaus da tutz, seigi quei sco fegl e frar, sco scolast da skis, sco commember d'uniuns ni sco vischin e camerat. Antieni Cavegn ei naischius ils 7 d'avrel 1940. Suenter la scola primara e secundara seprofitecha el dall'instruczion purila al «Plantahof», per lu collaborar cun anim e tschaffen el fatg puril da casa. Per anflar in gudogn accessori, fa el la patenta da scolast da skis ed en buca ditg eis el in dils megliers instructers. Igl Antieni veva iniziativa: Per emprender engles, serenda el duas gadas ell'Engeltiara. Buca mo igl unviern, mobein era las ulteriuras stagions s'occupava el — sper il puresser — d'ina ulteriura lavor: Dad ina firma dalla bassa vev'el surpriu l'incumbensa da cultivar steil'alvas ed autres flurs muntagnardas L'interpresa flureva stupent ed igl Antieni veva siu grond plascher gindlunder.

Il defunct veva aunc bia plans avon maun. Mo il tragic destin ha disfatg els. Sia mort prematura ha tuccau en emprema lingia ses geniturs e fargliuns, als quals el ei staus in fegl e frar exemplar. Nus admettein ad els nossa profunda condolentscha! Il cordoli ei denton generals. L'entira val ei en malencurada per siu bien vischin.

La sepultura ha documentau, tgei stema e simpatia il defunct gudeva: La societad da musica, ils tamburs ils scolasts da skis da Tujetsch e da Mustér en costum da professiun, ina delegaziun da bandiera dalla cumpignia da mats, numerus scolars da skis ed in pievelun han rendiu al defunct la davos'honur.

La societad da musica ha sunau per comiau da lur camerat la cumposizion significativa: «Ich hatt' einen Kamaraden, einen bessern findst du nicht...» Pertgei ha in tal camerat stoviu murirschi baul? Quella damonda veggan biars ad haver tschentau quels dis da malencurada. Ina risposta perschwendenta ei greva. Nossa suletta consolazion ei in seveser.

Il car Antieni rausso en pasch!

N.B.